



UTM

UNIVERSITI TEKNOLOGI MALAYSIA

PENGHAYATAN ETIKA & PERADABAN

BAB 3: ETIKA & PERADABAN DALAM KEPELBAGAIAN TAMADUN: ISLAM & MELAYU

Disediakan oleh:

Dr. Faizah Mohd Fakhruddin

innovative • entrepreneurial • global

ETIKA DAN PERADABAN DALAM KEPELBAGAIAN TAMADUN: ISLAM DAN MELAYU

OBJEKTIF PENGAJARAN:

1. Memahami tentang hubungan citra semesta (*worldview*) dengan etika di dalam tamadun Islam dan Melayu.
2. Mengetahui tentang isu-isu etika dan peradaban dalam tamadun Islam dan Melayu.
3. Menghayati nilai-nilai murni dalam tamadun Islam dan Melayu.

1) TAMADUN ISLAM

- Bermula pada kurun ketujuh masihi di semenanjung Tanah Arab iaitu sejak kerajaan di bawah pemerintahan nabi Muhammad s.a.w di kota Madinah.
- Tampuk pimpinan seterusnya diambil alih oleh para sahabat serta penguasa-penguasa Islam yang hebat seperti tokoh-tokoh di zaman khulafa' al-rashidin, bani Umayyah, Abbasiyah serta Turki Uthmaniyyah.
- Ia seterusnya berkembang dengan meluas dari Barat ke Asia Timur.

- Etika Islam adalah dikaitkan dengan istilah '*akhlaq*' atau jamak daripada *khuluq* di dalam bahasa Arab.
- Daripada sudut bahasa, ia bermaksud sikap, tabiat, budi pekerti, perangai dan tingkah laku (Mohd Liki Hamid & Rosnaaini Hamid, 2002: 108).
- Dari sudut istilahnya pula, ia dapat dimaksudkan sebagai tingkah laku semulajadi atau kebiasaan individu yang dipancarkan hasil daripada keadaan jiwa seseorang individu tersebut serta tanpa pertimbangan pemikiran terlebih dahulu (Abul A'la al-Maududi, 1967: 20).

1. Al-Quran
2. Al-Sunnah

- Islam melihat bahawa etika itu bukanlah hasil daripada timbangtara, pemikiran atau kebijaksanaan manusia biasa.
- Hanya Allah s.w.t serta RasulNya sahaja yang mempunyai autoriti terhadap sistem etika ini.
- Islam mempunyai standard serta prinsipnya sendiri yang disandarkan kepada al-Quran dan al-Sunnah.
- Disebabkan oleh ciri unik ini, maka sistem etika Islam adalah bersifat kekal serta tidak akan berubah-ubah dan tidak ditelan zaman kerana ia bersesuaian dengan fitrah manusia seiring dengan peredaran masa.

- Pada asasnya, citra semesta Islam itu sendiri berteraskan kepada prinsip tauhid yang menggariskan bahawa Allah s.w.t merupakan Pencipta semesta alam dan bahawa Allah s.w.t sahajalah yang wajib disembah oleh semua makhluk.
- Ini juga bermakna bahawa setiap anjuran dan segala laranganNya wajib ditaati atau dijauhi semata-mata mahu mengejar keberkatan daripadaNya serta ganjaran syurgaNya di Akhirat kelak.

- Penggalakkan terhadap nilai-nilai akhlak yang baik dapat diterapkan di dalam Islam kerana ketaatan dan ketakwaan yang kental terhadap Allah s.w.t merupakan satu isbat (sanction) yang efektif dalam melahirkan masyarakat Islam yang beretika dan berakhlak mulia (Afzalur Rahman, 2003).
- Ini dapat dibuktikan dengan adanya insentif serta penalti yang dijanjikan oleh Allah s.w.t dalam setiap nilai-nilai akhlak yang disebut di dalam al-Quran dan al-Sunnah.
- Insentif seperti keredhaan dan keberkatan hidup, limpahan rezeki, ganjaran syurga serta pahala bagi praktis akhlak yang baik merupakan satu kuasa penggerak yang berkesan agar masyarakat Islam itu berakhlak dengan akhlak yang mulia.

- Manakala, penalti seperti janji untuk pengakhiran yang buruk di neraka serta kekacauan hidup di dunia pula dapat menghindarkan masyarakat Islam daripada melakukan amalan-amalan yang negatif yang boleh merosakkan imannya, dirinya serta masyarakatnya.
- Keyakinan bahawa Allah s.w.t itu Maha Melihat perkara yang jelas atau yang tersembunyi mengukuhkan lagi isbat tersebut.
- Maka, seorang individu Islam yang baik seharusnya berusaha agar menjauhi dari melakukan perbuatan yang keji serta tercela baik di hadapan manusia lainnya mahupun secara tersorok yang jauh dari pandangan mata manusia kerana dia yakin bahawa setiap perbuatannya di bawah pengawasan Allah s.w.t. Seorang Islam yang beriman adalah seorang yang sentiasa mahukan redha Allah ke atasnya dan bukannya murkaNya.

- i. Etika mestilah selari dengan fitrah manusia**
 - Islam mempercayai bahawa fitrah atau sifat semulajadi manusia itu adalah baik serta suci dari noda sejak mereka dilahirkan.
 - Secara semulajadinya, manusia itu senang dan sukakan akhlak yang baik kerana ia bertepatan dengan fitrah semulajadinya.
 - Maka, akhlak yang baik seperti saling tolong-menolong, bercakap benar, mempunyai integriti, bersikap adil dan saksama amatlah disenangi dan digalakkan oleh Islam.

- Walaupun pada semulajadinya manusia dilahirkan dengan fitrah yang hanya sukakan kebaikan, namun mereka juga terdedah kepada perkara-perkara *sayyiat* (sikap-sikap jelik) disebabkan persekitaran serta agen-agen sosial yang mempengaruhi mereka seperti ibu bapa, keluarga serta masyarakat.
- Islam memandang bahawa seharusnya manusia akan merasa malu serta jelik dengan perbuatan-perbuatan yang berlawanan dengan fitrah mereka seperti sikap hasad (dengki), berdusta, mengamalkan korupsi dan zalim terhadap sesama manusia.

- Akhlak yang baik dikatakan sesuatu perlakuan yang menenangkan jiwa manakala perlakuan yang jelik menimbulkan perasaan tidak keruan di dalam hati serta merasakan bahawa ianya suatu aib (kelemahan/kecelaan) yang sebolehnya mahu disembunyikan daripada pengetahuan orang lain.
- Maka, dapatlah disimpulkan bahawa etika Islam itu selari dengan fitrah manusia melainkan fitrah itu sendiri telah tercemar.

ii. Etika mestilah selari dengan *al-din* (agama)

- Di dalam Islam, orang yang mempraktikkan etika atau akhlak yang mulia dilihat sebagai orang yang berjaya mempamerkan iman serta agamanya.
- Manakala orang yang melakukan perbuatan yang keji dianggap sebagai orang yang lemah iman serta agamanya.

iii. Etika mestilah membicarakan tentang dua dimensi sikap manusia

- Etika di dalam Islam juga perlulah menggariskan tentang dua dimensi sikap manusia iaitu dimensi sikap positif serta dimensi sikap negatif.
- Dimensi positif yang disebut di dalam al-Quran adalah seperti *al-ilm* (ilmu pengetahuan), *al-bayan* (wacana intelektual) dan *al-taqwim al-hasan* (karakter semulajadi yang baik) selalu dikaitkan dengan fitrah semulajadi manusia yang suci.
- Manakala, dimensi negatif pula menyebut tentang sikap-sikap jelik seperti *zalum* (zalim), *'ajul* (terburu-buru), *jadal* (berbalah) dan *al-ya'us* (berputus asa) sebagai sikap-sikap yang bertentangan dengan fitrah manusia serta terbit hasil daripada nafsu jahat manusia.

iv. Etika mestilah menyantuni hubungan manusia secara personal dan interpersonal

- *Personal* - melibatkan proses *tazkiyatun nafs* (penyucian diri) iaitu satu proses yang mana melibatkan penambaaikan intelek serta kerohanian jiwa yang berterusan. Proses ini amat penting agar dapat memastikan jiwa manusia itu sentiasa suci dan bersih dari sifat-sifat yang jelik dan tidak disukai dalam Islam.
- *Interpersonal* - menekankan tentang sikap-sikap yang patut diamalkan oleh manusia agar hubungannya dengan masyarakat serta makhluk lain terpelihara agar dapat hidup aman seperti saling bekerjasama, bersifat pemurah, bertimbang rasa, mempermudah urusan orang lain serta mengucapkan kata-kata yang baik sesama manusia.

NILAI-NILAI ETIKA DALAM ISLAM: AMANAH

- Dari segi bahasa, amanah bermaksud aman, damai, tenteram, selamat dan harmoni.
- Secara istilahnya, amanah bermaksud menyerahkan tanggungjawab kepada seseorang yang berhak menerimanya dan dipercayai agar melaksanakan tanggungjawab tersebut dengan jayanya tanpa mengabaikannya (Andi Mohamad, 2015: 2; Azman, 2002: 94).

Amanah

Terhadap Allah:

- Sebagai hamba: taat kepada perintah Allah dan menjauhi laranganNya.
- Sebagai khalifah: memelihara, memakmurkan serta membangunkan bumi agar lebih sejahtera.

Terhadap Rasulullah:

- untuk memelihara, menghargai, mencontohi serta mengamalkan segala sunnah Rasulullah s.a.w.

Terhadap diri sendiri:

- Lahiriah: menjaga kesihatan, kebersihan & memberi hak pada anggota pancaindera.
- Rohaniah: anggota pancaindera digunakan untuk beribadat dan bukannya untuk perbuatan sia-sia & dilarang.

Terhadap orang lain:

- Setiap manusia itu mestilah menjalankan amanahnya terhadap masyarakatnya sama ada dari sudut perkhidmatan, saling tolong-menolong, bekerjasama, bersikap ihsan, bercakap benar serta mengeluarkan zakat dan bersedekah.

NILAI-NILAI ETIKA DALAM ISLAM: TOLONG-MENOLONG


- Orang Islam berkewajipan menolong sesama manusia di dalam tiga kategori iaitu, menolong para kerabatnya (keluarga), menolong jiran sesama Islam serta menolong jiran bukan Islam (Azman, 2002).
- E.g. sikap orang Ansar menolong orang Muhajirin.
- Kaum Ansar yang tinggal menetap di Madinah menerima kedatangan kaum Muhajirin yang berhijrah dari Mekah ke kota Madinah dengan hati yang terbuka serta bersedia menolong mereka dari sudut kewangan serta tenaga fizikal dengan ikhlas tanpa mengharapkan apa-apa ganjaran.

NILAI-NILAI ETIKA DALAM ISLAM: PEMURAH

- Bersikap pemurah dapatlah diertikan dengan amalan membelanjakan hartanya di dalam hal-hal yang dituntut oleh *syara'* (Azman, 2002: 91).
- Ia terbit daripada pengorbanan iaitu pengorbanan dari sudut membelanjakan serta mewakafkan harta dan menderma di jalan Allah s.w.t. dengan ketulusan hati tanpa mengharapkan apa-apa ganjaran atau pujian.
- Impak:
 - i. membersihkan hati sang pemberi harta daripada segala sifat riak, sombong dan bongkak di atas pemilikan hartanya.
 - ii. menanam sikap saling sayang-menyayangi serta prihatin terhadap sesama insan.
 - iii. Status ekonomi masyarakat akan maju.
 - iv. Membasmi kemiskinan & kadar jenayah.

- Dari sudut bahasa, sabar dapat diertikan sebagai menahan diri.
- Secara istilahnya, ia merujuk kepada menahan atau menanggung diri daripada melakukan perkara-perkara jelik yang didorong oleh nafsu kepada perkara-perkara yang disukai dan diredhai oleh Allah s.w.t. (Azman Mat Zain, 2002: 93).
- Dunia ini dianggap sebagai pentas di mana manusia itu diuji dengan pelbagai rintangan dan pancaroba hidup sama ada dari sudut kewangan, kesihatan dan sebagainya.
- Jiwa perlu dididik supaya menjadi kuat dan kental dalam menghadapi segala ujian Allah s.w.t di dunia ini.
- Orang yang hilang sabarnya acapkali memperlihatkan amarahnya, berputus asa serta menyalahkan takdir di atas kesusahan yang ditimpakan ke atasnya.
- Sebaliknya, orang yang bersabar akan diberikan ganjaran amat besar kerana ia adalah satu sikap yang menunjukkan keimanan serta ketakwaan yang tinggi terhadap Penciptanya.

TAMADUN MELAYU



Peta Alam Melayu

- Tamadun Melayu adalah suatu Tamadun Kepulauan (Archipelagic Civilisation) yang tertua.
- Ia berkembang dalam Gugusan Kepulauan Melayu yang terletak di pelangkahan Khatulistiwa serta berpangkal daripada Semenanjung Tanah Melayu yang melunjur daripada Tanah Besar Benua Asia.
- Secara zahir, Alam Melayu adalah gugusan pulau-pulau serta Semenanjung Tanah Melayu yang didiami oleh rumpun bangsa Melayu semenjak zaman berzaman.
- Kepulauan ini serta lautan dan selat antaranya juga dikenali sebagai NUSANTARA (Nusa-antara-lautan).
- Inilah juga tanah air bagi rumpun bangsa Melayu yang berkongsi satu baka keturunan, persamaan adat-resam, satu bahasa dan budaya yang dipegang bersama.

- Peradaban yang tua inilah yang menjadi teras dan tunggak kepada negara-negara moden di Alam Melayu yang ada sekarang.
- Di sinilah berkembangnya satu rumpun bangsa Melayu, satu keturunan baka (DNA), satu bahasa dan satu ragam budaya.
- Dengan landasan hidup sedemikian, mereka melahirkan suatu Peradaban Kepulauan yang tersendiri dalam susila Peradaban Melayu yang lahir daripada pengalaman dan citra semesta kemanusiaan yang asli.

- Dalam membicarakan tentang sistem etika dalam peradaban Melayu, ia secara umumnya amatlah berkait rapat dengan istilah adat.
- Adat dari segi bahasanya adalah bermaksud kebiasaan ataupun sesuatu yang tidak bersifat kebendaan (Soleman, 1987).
- Dari sudut istilahnya pula, ia dapat ditakrifkan sebagai satu sistem atau panduan tingkahlaku yang diterima dan digunapakai secara turun-temurun dan diperakui oleh masyarakat akan amalannya sehingga dianggap sebagai satu tradisi yang perlu dilestarikan (Norazit, 1997).

- Adat berperanan sebagai tiang seri bagi masyarakat Melayu kerana ia berfungsi sebagai:
 - i. panduan bagi masyarakat Melayu mengatur perilakunya di dalam pelbagai institusi seperti institusi sosial, politik, ekonomi, undang-undang dan sebagainya.
 - ii. untuk menjamin dan memelihara keamanan, keharmonian serta kesejahteraan sosial agar kekacauan atau pergolakan dapat dielakkan.

KATEGORI ADAT

Adat yang diadatkan

Peraturan, hukum dan undang-undang yang diwariskan turun-temurun serta dipatuhi oleh masyarakat di dalam menjalani kehidupan sosial mereka (Mohd. Koharuddin, 2005).

Adat resam

Berbentuk lebih spesifik dan menghusus seperti kelaziman individu dari sudut perbuatan (Mohd. Koharuddin, 2005).

Ia adalah cerminan kepada pemikiran masyarakatnya yang bijaksana dalam menentukan peraturan berinteraksi sesama manusia yang bermatlamatkan permuafakatan, kerukunan dan ketenteraman. Disebabkan faktor sebeginilah masyarakat Melayu menyanjung tinggi adat ini agar keadilan dan kedaulatan undang-undang itu terpelihara.

Ini termasuklah segala jenis tingkahlaku yang diamalkan oleh masyarakat Melayu seperti cara berpakaian, cara makan, tatatertib di hadapan orang tua dan sebagainya.

- Selain adat, etika alam Melayu selalu juga dikaitkan dengan istilah adab.
- Dari sudut bahasa, ia dimaksudkan sebagai budi bahasa yang halus dan juga tingkah laku dan tutur kata yang sopan (Kamus Dewan, 1994: 6).
- Manakala, dari sudut istilahnya pula, ia diertikan sebagai tindakan atau perbuatan yang dipraktikkan secara wajar, tepat dan sesuai hasil daripada jasad, hati serta akal manusia yang terdisiplin (Hashim, 2008: 54).

- Kepercayaan masyarakat Melayu:

i. **Animisme**

- ☐ Satu kepercayaan yang mana meyakini bahawa setiap benda mempunyai roh, memiliki keperibadian tersendiri serta mempunyai kuasa dalam menentukan nasib seseorang individu (Taib Osman, 1977).

ii. **Hindu-Buddha**

- ☐ Berteraskan kepada keyakinan dengan kewujudan dewa-dewa yang berkuasa ke atas kehidupan manusia.
- ☐ Sistem kepercayaan Hindu-Buddha ini kuat mempengaruhi masyarakat Melayu pada zaman dahulu terutama di kalangan golongan istana. Misalnya, raja-raja dipandang mulia kerana mereka dikatakan sebagai jelmaan dewa-dewa.
- ☐ Justeru, mereka berhak diletakkan di kedudukan yang paling tinggi dek kerana statusnya bukan lagi dianggap taraf manusia biasa tetapi status dewa (Mohd. Koharuddin, 2005).

iii. Islam

- ❖ masyarakat Melayu sebenarnya lebih kuat dipengaruhi oleh agama Islam.
- ❖ Kedatangan Islam bukan sahaja mencetuskan revolusi dalam mengubah pandangan masyarakat Melayu tentang keyakinan mereka terhadap kewujudan roh-roh, semangat serta dewa-dewa, bahkan ianya sekaligus mengubah stratifikasi sosial masyarakat Melayu iaitu daripada mempercayai bahawa raja itu adalah jelmaan dewa-dewa kepada khalifah (wakil Tuhan) di muka bumi.
- ❖ Maka, sebagai orang Islam, masyarakat Melayu berpegang kepada konsep *tauhid* iaitu mengEsakan Allah s.w.t tanpa menyamakan Dia dengan sesuatu yang lain.
- ❖ Allah s.w.t merupakan satu-satunya Tuhan Pencipta dan selayaknya disembah tanpa meneyekutukannya dengan yang lain.

- ❖ Nabi Muhammad s.a.w pula diimani sebagai nabi terakhir yang diutuskan oleh Allah s.w.t dalam menyampaikan ajaran Islam, iaitu satu-satunya agama yang diredhai Allah s.w.t. Al-Quran dan al-Sunnah merupakan dua sumber atau teras dalam setiap aspek kehidupan masyarakat Melayu.
- ❖ Ini termasuklah penyerapan elemen Islam ke dalam aspek etika, sistem nilai serta adat yang berlandaskan syariat Islam (peraturan bersumberkan hukum Islam).

*‘Adat bersendikan hukum,
Hukum bersendikan syara’,
Syara’ bersendikan kitabullah.
Syara’ mengata, adat memakai,
Ya kata syara’, benar kata adat.*

NILAI-NILAI ETIKA PERADABAN MELAYU: HALUS BUDI PEKERTI & BAHASA

*Kalau hendak tahu orang berbangsa,
Tengok kepada budi dan bahasanya;
Dalam berkata berlemah lembut,
Dalam melangkah berpatut-patut,
Bila duduk tahu tempatnya,
Bila tegak tahu adatnya.*

NILAI-NILAI ETIKA PERADABAN MELAYU: MEMULIAKAN IBU BAPA & ORANG TUA

*Apa tanda Melayu jati,
Mentaati ibu bapa sepenuh hati;
Apa tanda Melayu jati,
Kepada ibu bapa ia berbakti.*

NILAI-NILAI ETIKA PERADABAN MELAYU: KESETIAAN KEPADA PEMIMPIN

*Elok kampung ada tuanya, elok negeri ada rajanya,
Adat hidup orang terhormat, kepada pemimpinnya ia taat.
Raja adil raja disembah,
Raja zalim raja disanggah.*

NILAI-NILAI ETIKA PERADABAN MELAYU: MEMPERTAHANKAN SERTA MEMBELA KEADILAN & KEBENARAN

*Apa tanda Melayu jati,
Membela kebenaran berani mati,
Berani kerana benar,
Berani pada yang hak,
Berani menegakkan keadilan,
Berani menghapus arang di kening,
Berani mati memegang amanah,
Berani mati membela maruah,
Berani mati di jalan Allah.*

NILAI-NILAI ETIKA PERADABAN MELAYU: MEMENTINGKAN MARUAH SERTA HARGA DIRI

*Adat hidup orang bertuah,
Aib dan malu dijadikan amanah,
Membawa diri tiada menyalah,
Malu duduk menengah-nengah,
Malu berdiri sombong dan pongah,
Berbuat kebaikan tiada gah,
Bercakap dengan berlembut lidah.*

NILAI-NILAI ETIKA PERADABAN MELAYU: BERMUAFAKAT & TOLONG-MENOLONG

*Apa tanda hidup beradat:
Runding selesai dalam muafakat,
Hak ditakar, kewajiban disukai,
Mana yang jauh diperdekat,
Mana yang jarang diperapat,
Mana yang lupa diberi ingat,
Kata putus pendapat pun bulat,
Seia sekata ke laut ke darat.*

NILAI-NILAI ETIKA PERADABAN MELAYU: AMANAH

*Orang amanah membawa tuah,
Orang amanah hidup bermaruah,
Orang amanah dikasihi Allah,
Siapa hidup memegang amanah,
Dunia akhirat beroleh berkat.*

- Antara penghayatan nilai yang penting dalam bab ini adalah:
 - i. Memahami serta menghalusi nilai-nilai murni yang dianjurkan oleh Islam yang mana dipraktikkan oleh tamadun Islam dan tamadun Melayu agar melahirkan warga yang berfikiran terbuka, bertoleransi serta beretika di dalam negara Malaysia yang berbilang kaum.
 - ii. Menghayati kepentingan kemajuan aspek bukan kebendaan (dari sudut etika) yang seharusnya bergerak seiring dengan kemajuan kebendaan agar dapat dijadikan model untuk diteladani oleh masyarakat masa kini.

KESIMPULAN

- Adalah dapat disimpulkan bahawa terdapat banyak persamaan di dalam isu-isu etika yang dipraktikkan oleh kedua-dua tamadun Islam dan Melayu.
- Keduanya bertunjangkan al-Quran dan al-Sunnah yang mendasari sumber etikanya.
- Walaupun tamadun Melayu pada mulanya menerima pengaruh animism serta Hindu-Buddha, namun ternyata prinsip-prinsip Islam lebih ditekankan dalam adat-adat yang menjadi garis panduan etika bagi masyarakatnya.
- Ciri-ciri inilah yang melonjakkan kedua-dua tamadun ini mencapai zaman kegemilangan berabad lamanya kerana ia bukan sahaja menekankan kemajuan dalam bentuk kebendaan sahaja, malah kemajuan dari sudut bukan kebendaan juga perlu seiring agar pembangunan dapat dikecapi secara holistik.